

## TUS KHETOS COV LUS QHIA

**T**au ntev lawm Yexus Khetos cov lus qhia uas nyob hauv phau Vaj Lug Kub Npaiv Npaum tau ua ib lub hauv paus rau tib neeg ntiav teb txoj kev tshoov siab. Yeej muaj tus Cawm Seej cov lus qhia ntxiv nyob hauv ib phau vaj lug kub uas ua khub rau phau Vaj Lug Kub Npaiv Npaum—hu ua Phau Ntawv Maumoos: Ib Zag Ua Tim Khawv Ntxiv txog Yexus Khetos. Ob phau vaj lug kub no yuav coj kev kaj siab lug thiab kev zoo siab uas kav ntev los rau hauv koj lub neej vim ob phau no txoj kev coj kev uas los saum ntuj los.

Kom tau txais koj Phau Ntawv Maumoos: Ib Zag Ua Tim Khawv Ntxiv txog Yexus Khetos pub dawb, cia li mus xyuas qhov Web site nram qab no los sis sau ntawv:

## YEXUS KHETOS

LUB KOOM TXOOS  
NTAWM TSOOM  
HAIV NEEG NTSEEG  
HAUV HNUB NYOOG KAWG

[www.mormon.org](http://www.mormon.org)

## TUS YAJ SAUB YAUXEJ XAMIV ZAJ LUS TIM KHAWV

Yexus Khetos lub Koom  
Txoos ntawm Tsoom Haiv  
Neeg Ntseeg hauv Hnub  
Nyoog Kawg



## Yauxej Xamiv: Vajtswv ib tug Yaj Saub

**T**haum Yauxej Xamiv muaj 14 xyoos, nws xav paub hais tias nws yuav tsum koom lub koom txoos twg, ces nws thiaj li thov Vajtswv tiag tiag. Xwv kom teb zaj lus thov Vajtswv no, Vajtswv Leej Txiv thiab Nws Leej Tub, Yexus Khetos, tau tshwm sim rau Yauxej pom thiab tau qhia nws hais tias Yexus Khetos lub Koom Txoos tseeb twb tsis nyob hauv ntiaj teb thiab nkawd tau xaiv Yauxej kom pab nkawd koj nws lub koom txoos rov qab los txum tim.

Txij thaum ntawd los, Yauxej tau ua hauj lwm rau Vajtswv, ua hauj lwm pab tsa Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyooog Kawg thiab pab tsa Vajtswv lub nceeg vaj nyob rau hauv lub ntiaj teb thaum hnub nyoog kawg no. Cov ntseeg ntawm lub Koom Txoos uas koj ruaj nrees ua tim khawv hais tias Yexus Khetos yog tus Cawm Seej thiab tus Txhiv Dim rau lub ntiaj teb. Niaj hnub no Yexus koj Nws lub Koom Txoos dhau los ntawm txoj kev tshwm sim rau ib



*Thaum nws tab tom xav saib nws yuav koom lub koom txoos twg, Yauxej nrhiav hauv phau Vaj Lug Kub Npaiv Npaum kom tau tswv yim. Nyob ntawd nws nyeem hais tias, "Thov Vajtswv."*

tug yaj saub nyob hauv ntiaj teb. Yauxej Xamiv yog ib tug yaj saub zoo li ntawd. Tab txawm Yauxej tau ua ntau tsav ntau yam thaum nws ua neej nyob los, qhov tseem ceeb tshaj plaws uas nws tau ua yog ua ib tug thwj tim rau thiab ib tug tim khawv txog Yexus Khetos. Tus Yaj Saub Yauxej Xamiv thiab Sidney Rigdon tau hais tias tom qab tag nrho cov lus tim khawv uas tau hais txog tus Cawm Seej, nkawd ua tim khawv, thaum kawg no hais tias nws muaj txoj sia nyob tiag! (Saib phau Lus Qhuab Qhia thiab Kev Khi Lus 76:22).

Cov neeg uas txais tus Yaj Saub zaj lus tim khawv dhau los ntawm lub hwj chim ntawm tus Vaj Ntsuj Plig Dawb Huv yuav paub qhov tseeb txog txoj hauj lwm uas nws raug hu los ua. Lawv cov no yuav ntsib tau qhov kev kaj siab lug thiab qhov kev zoo siab uas los ntawm tus Cawm Seej Yexus Khetos, uas yog tus uas Yauxej Xamiv tau ua hauj lwm rau thiab tau teev tiam.

## Lub Koom Txoos Twg Thiaj Muaj Tseeb?

Yauxej Xamiv yug rau thaum xyoo 1805 hauv lub zos Sharon, lub xeev teb Vermont. Lub sij hawm thaum koj nyeem txog no, Yauxej Xamiv muaj 14 xyoos xwb, thiab nws nrog nws tsev neeg nyob hauv lub xeev teb New York. Thaum ntawd, nws tab tom xav zoo zoo saib nws yuav tsum koom lub koom txoos twg. Nram qab no yog tej yam tau muaj los rau Yauxej, sau raws li nws cov lus tiag.

**T**haum lub sij hawm no uas teb chaws ncha txog tej kev teev ntuj kuv pheej xav tob tob thiab raug kev nyuaj siab ntau...Feem ntau kuv hais rau kuv tus kheej hais tias: Kuv yuav ua li cas? Pab twg ntawm tag nrho tej pab no thiaj muaj tseeb; los sis, lawv puav leej puas yuam kev tag nrho? Yog hais tias lawv ib pab twg thiaj yog, nws yog pab twg, thiab kuv yuav ua li cas thiaj paub?

Thaum kuv tab tom sib zog xav txog tej kev cov nyom uas muaj vim tej pab teev ntuj no tej kev sib cav sib ceg, muaj ib hnub kuv nyeem Yakaunpaus Tsab Ntawv, tshooj ib nqes tsib, uas hais tias: "Yog nej cov leej twg tsis muaj tswv yim, nws cia li thov Vajtswv, Vajtswv yuav pub tswv yim rau nws, rau qhov Vajtswv yog tus muaj lub siab dawb siab zoo pub ib puas tsav yam rau sawv daws tsis khuv xim hlo li."

Yeej tsis muaj dua ib nqes vaj lug kub uas tau muaj hwj chim raug ib tug tib neeg twg lub siab ntau tshaj nqes no tau raug kuv lub siab thaum ntawd. Zoo

nkaus li nqes vaj lug kub ntawd chob nkaus kuv lub siab. Kuv xav txog nws ntau heev, vim kuv paub hais tias yog tias ib tug tib neeg twg xav tau tswv yim, twb yog kuv xav tau tiag tiag; vim kuv twb tsis paub hais tias kuv yuav koj zoo li cas, thiab tsuas yog kuv txais tau tswv yim ntau tshaj kuv tau muaj tam sim ntawd, kuv yeej yuav tsis paub; vim cov xib hwb qhia kev teev ntuj ntawm cov kev teev ntuj sib txawv tau to taub tib nqes vaj lug kub sib txawv txav heev ua rau yus poob siab ntau vim yus nrhiav lus teb hauv phau Vaj Lug Kub Npaiv Npaum rau lo lus noog no tsis tau.

Thaum kawg, kuv txiav txim siab hais tias kuv yuav tsum nyob hauv qhov tsaus thiab muaj kev ntshov siab ntshov plawv, los sis kuv yuav tsum ua raws li Yakaunpaus hais, ua yog, thov Vajtswv. Tom qab ib ntus, kuv txiav txim siab hais tias kuv yuav “thov Vajtswv,” vim kuv xav tias yog tias nws pub tswv yim rau cov uas tsis muaj tswv yim, thiab nws yuav koj siab dawb siab zoo pub ib puas tsav yam rau sawv daws tsis khuv xim hlo li, kuv mam li sim pheej hmoov.

## Yauxej Xamiv txoj Kev Ua Yog Toog Thawj Zaug

**R**aws li kuv txoj kev txiav txim siab thov Vajtswv, kuv txawm mus xyuas koog ntoo kom sim ua li



ntawd. Nws yog ib tag kis sawv ntxov zoo nkauj kawg nkaus, tshav ntuj nrig, nyob lub caij nplooj ntoo hlav thaum ntxov thaum xyoo ib txhiab yim pua nees nkaum. Nws yog thawj zaug hauv kuv lub neej uas

*Nkawd ib  
tug...taw tes  
rau tus i thiab  
hais tias—“Tus  
no yog Kuv tus  
Tub uas Kuv  
Hlub, Cia  
Li Mloog  
Nws Lus!”*

kuv tau sim ua li no, vim txawm hais tias kuv tau muaj kev ntshov siab ntau yam los kuv yeej tsis tau sim thov Vajtswv nrov.

Tom qab kuv tau mus txog qhov chaw uas ua ntej ntawd kuv tau teem tseg tias kuv yuav mus, kuv xam ncig lees thiab pom tias kuv nyob kuv ib leeg xwb, ces kuv txawm txhos caug thiab pib nthuav kuv lub siab tej kev xav rau Vajtswv. Kuv nyuam qhuav pib ua li ntawd kiag

xwb na has tam sim ntawd txawm muaj ib lub hwj chim ntes kuv uas kov yeej kuv tag nrho, thiab nws muaj peev xwm kav kuv npaum li nws khi kuv tus nplaig ua rau kuv hais tsis tau lus. Qhov tsaus ntuj nti sau nthwv los roos kuv, thiab ib me ntsis nws zoo nkaus li kuv twb yuav raug hmoov phem thiab raug puas tsuaj mus.

Tab sis mas, kuv siv tag nrho kuv lub dag zog thov txog Vajtswv kom Nws cawm kuv dim ntawm tus yeeb ncuab uas tau ntes kuv no lub hwj chim. Thiab thaum lub sij hawm ntawd kiag uas kuv twb yuav poob siab thiab qhau rau txoj kev puas tsuaj mus—tsis yog rau ib txoj kev puas tsuaj uas tsis muaj tseeb, tiam sis rau lub hwj chim ntawm ib tug neeg dab tsi uas los ntawm lub ntuj uas tib neeg pom tsis tau los, uas muaj hwj chim loj kawg uas kuv yeej tsis tau pom dua hauv ib tug neeg hlo li. Tiam sis mas twb yog thaum kuv tab tom ceeb nkaus, kuv pom dheev ib lub ncej huab kaj nrig nyob ncaj ntawm ib nta ntuj saum kuv lub taub hau, uas ci ntsa iab tshaj lub hnuv qhov kaj, thiab uas nqis los mus txog thaum nws roos nkaus kuv tag nrho.

**Q**hov kaj ntawd nyuam qhuav tawm los xwb ces kuv txawm pom tias kuv raug dim ntawm tus yeeb ncuab uas tau ntes kuv ntawd. Thaum qhov kaj ntawd los roos kuv tag nrho kuv pom ob tug Neeg uas nkawd qhov kaj thiab qhov yeeb koob piav tsis tau li, thiab nkawd tab tom sawv ntawm ib nta saum



kuv lub taub hau. Ib tug hais lus rau kuv, tuav kuv lub npe thiab taw tes rau tus i hais tias— “Tus no yog Kuv tus Tub uas Kuv Hlub, Cia Li Mloog Nws Lus!”

**K**uv lub hom phiaj mus noog txog tus Tswv yog kom paub saib txoj kev teev ntuj twg thiaj muaj tseeb, kom kuv thiaj li paub hais tias kuv yuav tsum koom lub twg. Yog li ntawd, thaum kuv tswj tau kuv tus kheej kom kuv thiaj li hais tau lus kuv txawm noog tus Neeg uas sawv hauv qhov kaj ntawm ib nta saum kuv lub taub hau saib txoj kev teev ntuj twg thiaj muaj tseeb (vim thaum lub sij hawm ntawd kuv tsis tau xav hais tias txhua txhia txoj kev teev ntuj tsis muaj tseeb)—thiab saib kuv yuav tsum koom txoj kev teev ntuj twg.

Nws teb kuv hais tias kuv yuav tsum tsis txhob koom ib txoj twg li, vim lawv puav leej tsis muaj tseeb. Thiab tus Neeg uas hais lus rau kuv ntawd hais tias tag nrho lawv tej kev ntseeg ntawd nws tsis pom muaj nuj nqis dab tsi li. Nws hais tias tej xib hwb qhia vaj lug kub ntawd siab nkhaus tag nrho. Thiab nws hais tias “Tej neeg no khav hais tias lawv pe hawm kuv tiam sis lawv tsis hais lus tseeb, lawv lub siab tsis npuab kuv. Lawv tsuas coj raws li tej kab ke uas neeg rhawv tsim, thiab hais raws li tej kev cai uas lawv cim rau nruab siab xwb.”

Ib zaug ntxiv nws txwv tsis pub kuv mus koom luag tej ib txoj kev teev ntuj twg; thiab nws tau hais ntau yam ntxiv rau kuv thiab, uas kuv sau tseg tam sim no tsis tau. Thaum kuv tsim dheev los dua ib zaug, kuv pom tias kuv pw ntxeev tiaj, ntsia saum ntuj. Thaum qhov kaj ntawd tau ploj mus lawm, kuv twb tsis muaj zog hlo li; tiam sis tsis ntev kuv rov qab muaj zog ces kuv tau mus tsev.

### **Keu Tsim Txom**

*Yauxej tau mloog Vajtswv lus thiab tsis tau koom ib lub tshawj twg hlo li. Thaum nws qhia lwm tus neeg txog tej yam nws tau pom thiab tau hnov nws pib raug kev tawm tsum thiab kev tsim txom.*

**T**sis ntev kuv pom...hais tias thaum kuv qhia kuv zaj no tawm nws ua rau cov xib hwb qhia vaj lug kub khib kuv heev. Thiab li no kuv thiaj raug kev tsim txom loj heev uas pheej loj zuj zus tuaj. Thaum ntawd kuv yog ib tug tub hluas twb tsis nrov hlo li, tsuas muaj hnub nyoog kaum plaub kaum tsib xyoos xwb. Kuv lub neej txom nyem heev ua rau kuv ua ib tug tub hluas twb tsis tseem ceeb dab tsi li. Tab txawm li no los tib neeg muaj suab muaj npe yuav saib kuv tseem ceeb txaus kom txhib luag tej zej zog tawm tsum kuv thiab tsim txom kuv; thiab txhua txhia txoj kev teev ntuj tau ua li no—sib koom siab tsim txom kuv heev.

Thaum ntawd nws ua rau kuv xav mus xav los tob tob, thiab txij thaum ntawd los ib yam, txog qhov uas nws txawv txav heev uas ib tug tub hluas twb tsis nrov hlo li li kuv, uas tsuas muaj hnub nyoog kaum plaub xyoos tawm xwb, thiab uas, vim kuv txoj hmoov tsis zoo, yuav tsum niaj hnub mus ua zog kom tau me ntsis noj haus xwb, yuav ua rau luag tej saib kuv tseem ceeb txaus yuav muaj cov neeg nrov

tshaj plaws ntawm txhua txhia txoj kev teev ntuj uas nrov tshaj thaum ntawd noog txog kuv, thiab ua rau lawv khib kuv heev mus txog thaum lawv ua ib siab tsim txom thiab thuum kuv. Tab sis mas, txawm hais tias nws txawv los tsis txawv los puam chawj, nws yeej zoo li ntawd, thiab li no nws ua rau kuv tu siab heev.

Tsis kav, nws twb yog ib qho tseeb uas kuv tau pom ib txoj kev ua yog toog. Txij thaum ntawd los kuv tau xav ntau zaus hais tias kuv muaj ntsis zoo li Pov Lauj, thaum nws qhia nws zaj rau tus Vaj Ntxwv Akipas txog qhov uas nws tau ua yog toog pom ib qho kaj, thiab tau hnov ib lub suab; txawm li ntawd los tsuas muaj cov tsawg uas ntseeg nws xwb; ib txhia hais tias nws hais tsis ncaj, ho lwm tus neeg hais tias nws vwm; thiab tib neeg tau luag nws thiab thuum nws. Txawm yog li ntawd los, tej no tsis ua rau qhov tseeb uas nws tau pom ib txoj kev ua yog toog ploj mus. Nws tau pom ib txoj kev ua yog toog, nws paub li ntawd tiag tiag, thiab tab txawm txhua txhia tus tib neeg hauv qab ntuj khwb no sau nthwv tsim txom nws vim qhov ntawd los lawv hloov tsis tau qhov tseeb ntawd; thiab tab txawm lawv yuav muab nws tsim txom mus txog thaum nws tuag los nws tseem paub qhov tseeb, thiab nws yuav tuav rawv qhov tseeb ntawd mus txog thaum nws huaj cheej nti nthawv nthav tuag, hais tias nws tau pom ib qho kaj thiab tau hnov ib lub suab hais lus rau nws, thiab tag nrho lub ntiaj teb yeej yuav qhia tsis tau nws hais tias qhov ntawd tsis muaj tseeb.

**K**uv los zoo ib yam. Kuv twb tau pom ib qho kaj thiab, thiab nyob hauv qhov kaj ntawd kuv tau pom ob tug Neeg thiab muaj tseeb tiag nkawd tau hais lus rau kuv; thiab tab txawm luag tej ntsub kuv thiab tsim txom kuv vim kuv hais tias kuv tau pom ib txoj kev ua yog toog los, nws tseem muaj tseeb; thiab thaum lawv tab tom tsim txom kuv, luag thuum kuv, thiab hais kuv plig vim kuv hais li ntawd, kuv xav hauv kuv nruab siab hais tias: Vim li cas nej thiaj li tsim txom kuv vim kuv hais qhov tseeb? Kuv twb pom ib txoj kev ua yog toog; thiab kuv yog leej twg uas yuav tiv taus Vajtswv, los sis vim li cas ntiaj teb tib neeg yuav sim ntxias kom kuv thim kuv cov lus txog tej yam kuv tau pom tiag? Vim kuv tau pom ib txoj kev ua yog toog; kuv tau paub li ntawd, thiab kuv paub hais tias Vajtswv tau paub li ntawd, thiab kuv thim tsis tau qhov ntawd, kuv twb tsis muaj cuab

kav thim tau; vim yog hais tias kuv yuav thim, kuv yuav tub qaag Vajtswv thiab raug txim txhaum.

Nim no hais txog ntiaj teb tib neeg tej kev teev ntuj kuv tau txaus siab hais tias kuv tsis muaj lub

*Kuv tau pom  
ib txoj kev ua  
yog toog; kuv  
tau paub li  
ntawd, thiab  
kuv paub hais  
tias Vajtswv  
tau paub li  
ntawd, thiab  
kuv thim  
tsis tau qhov  
ntawd, kuv twb  
tsis muaj cuab  
kav thim tau.*

luag hauj lwm koom lawv hlo li. Tiam sis mas kuv yuav tsum coj zoo li qub mus txog thaum kuv tau lus qhuab qhia ntxiv. Kuv nrhiav tau hais tias Yakanpaus zaj lus tim khawv muaj tseeb hais tias ib tug tib neeg uas tsis muaj tswv yim yuav thov noog txog Vajtswv tau thiab Vajtswv yuav pub tswv yim rau nws tsis khuv xim hlo li.

Kuv txawm ua kuv tej hauj lwm zoo li qub tom ntej mus txog thaum lub Cuaj Hlis ntuj hnub tim nees nkaum ib, ib txhiab yim pua nees nkaum peb. Thiab tag nrho lub sij hawm ua ntej ntawd kuv tau raug tsim txom ntau heev los ntawm txhua txhia hom tib

neeg, txawm lawv ntseeg Vajtswv los tsis ntseeg, vim kuv pheed ua tim khawv hais tias kuv tau pom ib txoj kev ua yog toog.

Nyob rau ntu txij thaum kuv tau ua yog toog mus rau xyoo ib txhiab yim pua nees nkaum peb ntawd, kuv tau raug txwv kom tsis txhob koom ib txoj kev teev ntuj twg li. Kuv hluas heev. Thiab cov neeg uas yuav tsum yog kuv cov phooj ywg thiab yuav tsum ua zoo rau kuv tau tsim txom kuv heev. Yog hais tias lawv xav hais tias kuv vwm me ntsis, kuj tsim nyog lawv sim ua tib zoo hlob kuv thiab pab kuv kom kuv zoo zog. Yog li ntawd, vim tej no kuv raug ntxias ntau. Kuv tau ntsib ntau hom neeg thiab feem ntau kuv yuam kev ntau yam ruam me ntsis, thiab tau coj zoo li ib tug tub hluas uas tsis paub tab, thiab tau ua tej yam tsis zoo uas tib neeg feem coob ua. Tej no, kuv muaj ntsis txaj muag hais, tej no ua rau kuv raug ntxias ntau yam txawv, uas Vajtswv tsis nyiam kiag li. Tab txawm kuv lees txim li no los nej ib tug neeg twg tsis tas xav hais tias kuv tau ua txhaum loj heev uas

yuav ua rau tib neeg mob los yog tuag los yog. Kuv yeej tsis tau muaj tus ceeb xeem ua txhaum li ntawd ib zaug li.

## Maulaunais Los Xyuas

*Vim Yauxej tsis kam thim nws cov lus hais tias nws tau pom Vajtswv nws raug tsim txom ntau. Thaum lub Cuaj Hlis ntuj hnub tim 21, xyoo 1823, tom qab uas nws tau pw saum txaj, Yauxej tau thov Vajtswv kom nws qhia rau kuv saib kuv puas tsim nyog thiab zoo rau ntawm tus Tswv lub xub ntiag. Tus tim tswv Maulaunais tau tshwm sim los rau nws pom.*

**N**yoob yav yuav tsaus ntuj thaum lub Cuaj Hlis ntuj hnub tim nees nkaum ib, tom qab kuv tau pw saum txaj, kuv tau coj kuv tus kheej los thov thiab hawm Vajtswv uas muaj hwj chim loj kawg nkaus kom nws zam tag nrho kuv tej kev txim txhaum thiab kom nws qhia rau kuv saib kuv puas tsim nyog thiab zoo rau ntawm tus Tswv lub xub ntiag; vim kuv twb xav hais tias kuv yuav tau txais kev tshwm sim dua ib zaug li yav tas los lawd.



*Peb xyooos tom qab Yauxej Xamiv Txoj Kev Ua Yog Toog Thawj Zaug, Vajtswv tau txib tus tim tswv Maulaunais kom qhia Yauxej txog txoj kev coj Yexus Khetos txoj Moo Zoo rov qab los txum tim.*

Thaum kuv tseem tab tom thov Vajtswv li no, kuv tau pom ib qho kaj tshwm los rau hauv kuv chav tsev ntawd, ci loj zuj zus tuaj ntxiv mus txog thaum chav tsev ci tshaj dua li thaum tav su, ces txawm muaj ib tug zoo li neeg tau tshwm plaws los nyob rau ntawm kuv txaj pw ib sab, sawv ntsug nyob saum ib nta, vim nws txhais ko taw tsis chwv plag tse.

Nws tau hnav ib lub tsho tshaj sab xooob uas dawb zoo nkauj tshaj li. Nws yog ib qho dawb uas dawb tshaj ib puas tsav yam huv tib si nyob hauv lub ntiaj teb no uas kuv tau pom; thiab kuv kuj tsis ntseeg tias yuav muaj tau ib yam dab tsi hauv lub ntiaj teb no uas yuav ua tau kom pom dawb thiab ci heev npaum li ntawd. Nws ob txhais tes do cuas, thiab nws ob txhais caj npab los kuj do cuas thiab, ob lub tes tsho nyob ib nyuag siab zog saum nws ob lub dab teg; ces, nws ob txhais ko taw los kuj do cuas thiab, ib yam li nws ob txhais ceg, tus tw tsho nyob ib nyuag siab zog saum nws dab taws. Nws lub taub hau thiab lub caj dab los kuj do cuas thiab. Kuv pom tau tias nws tsis hnav lwm cev khaub ncaws ntxiv tsuas yog lub tsho tshaj sab no xwb, li nws dawb do, ces kuv thiaj pom tau mus rau hauv nws lub hauv siab.

Tsis yog nws lub tsho tshaj sab thiaj dawb paug xwb, tiam sis nws lub cev tag nrho huv tib si kuj muaj yeeb koob ci ntsa iab tshaj dua li qhov yuav piav tau, thiab nws lub ntsej muag zoo tib yam li xob laim. Chav tsev tau kaj heev kawg li, tiam sis tsis ci cuag li nyob ib thaj tsam ncig nws. Thaum thawj zaug uas kuv tsa qhov muag ntsia nws, kuv tau ntshai; tiam sis tsis ntev qhov ntshai cia li ploj lawm.

Nws hu kuv tuav npe, thiab hais rau kuv tias nws yog ib tug tub txib uas raug xa los ntawm Vajtswv lub xub ntiag los cuag kuv, thiab hais tias nws lub npe hu ua Maulaunais; hais tias Vajtswv muaj ib txoj hauj lwm rau kuv ua; thiab hais tias kuv lub npe yuav raug muaj mus rau qhov zoo thiab qhov phem nyob hauv txhua haiv neeg, txhua xeem neeg, thiab txhua yam lus, los sis hais tias tej neeg sawv daws yuav hais phem thiab hais zoo txog kuv lub npe.

**N**ws hais tias muaj ib phau ntawv uas tau muab zaib tseg lawm, uas muab sau rau saum ib co phiaj kub, es muaj ib zag hais txog thaj av no cov neeg yav ntuj thaum ub, thiab qhov chaw uas lawv tau tuaj qhov twg tuaj. Nws kuj tau hais tias txhij txhua ntawm txoj moo zoo uas nyob mus ib txhis kuj

ntim muaj nyob hauv, xws li tus Cawm Seej tau coj los rau cov neeg thaum ub uas nyob hauv thaj av no;

Thiab nws kuj hais tias, muaj ob lub pob zeb nyob hauv ib tug pas tseem nyiaj uas koov me ntsis–thiab ob lub pob zeb no, tau muab khi rau ib daim hlau npog hauv siab, ua tau qhov uas hu ua lub Ulees thiab Thumees–tau muab zais nrog cov phiaj; thiab cov neeg uas muaj thiab siv ob lub pob zeb no yog ob lub uas hu ua ob lub “pom tau” nyob rau yav thaum ub los sis yav ntuj ua ntej lawm; thiab Vajtswv tau npaj cov no los siv txhais phau ntawv no.

**T**om qab nws tau qhia tej no rau kuv, nws txawm pib qhia cov lus uas cov yaj saub nyob hauv Phau Qub sau tseg uas tau hais txog tej uas yuav muaj los yav tom ntej rau kuv. Nws xub qhia ib feem los ntawm phau Malaki tshooj peb; thiab nws kuj qhia los ntawm tshooj plaub los sis tshooj kawg ntawm tib phau qhia tej uas yuav muaj los yav tom ntej ntawd, tiam sis nws muab hloov kom txawv me ntsis qhov uas sau tseg hauv peb cov Vaj Lug Kub Npaiv Npaum.



*Nyob rau thaum xyoo 421 A.D. tus yaj saub Maulaunais tau muab nws haiv neeg phau ceev xwm txheej dawb ceev faus cia hauv lub Toj Khumaulas. Nws rov qab los, zaum no ua ib tug neeg uas tau sawv rov los lawm, rov los qhia Yauxej Xamiv txog phau ceev xwm txheej ntawd, uas muaj txhij txhua ntawm txoj moo zoo nyob hauv, xws li tus Cawm Seej tau coj los rau cov neeg thaum ub uas nyob hauv thaj av Amelikas no. Phau ceev xwm txheej no yog Phau Ntawv Maumoos.*

Nws tsis hais tib co lus ntawm nqes ib raws li nws sau tseg hauv peb cov vaj lug kub, nws hais txawv li no hais tias:

“Vim saib seb, yuav muaj ib hnuv twg cov neeg khav txiv, thiab cov neeg ua phem yuav kub hnyiab liav yam nkaus li tej quav nyab. Vim lawv cov uas los yuav ua rau cov neeg ua phem kub hnyiab, tus uas yog Tib Neeg tus Tswv hais, ua rau lawv kub hnyiab tas huv tib si, tsis seem ib tug hlo li.”

Thiab ib zaug ntxiv, tus tim tswv tau qhia nqes tsib li no hais tias: “Saib seb, thaum tseem tsis tau txog kuv tus uas yog tus Tswv hnuv tseem ceeb uas kuv txiav txim, kuv yuav muab lub Pov Thawj Hwj tshwm sim qhia rau nej pom, dhau los ntawm tus yaj saub Eliyas.”

Thiab tus tim tswv tau qhia nqes tom ntej txawv me ntsis thiab hais tias: “Thiab nws yuav muab tej lus cog tseg uas cov me tub me nyuam tau cog rau lawv cov poj koob yawm txwv cog rau hauv cov me tub me nyuam lub siab, thiab cov me tub me nyuam tej siab tej ntsws yuav tig mus nrhiav lawv cov poj koob yawm txwv. Yog tsis muaj li ntawd, cais tus Tswv yuav rhuav lub ntiaj teb kom puas tsuaj tas huv tib si thaum nws los.”

Txuas ntxiv rau tej lus qhia tej yuav muaj los yav tom ntej no, tus tim tswv tau qhia tshooj kaum ib ntawm phau Yaxayas hais tias tsis ntev nws twb yuav raug tiav tas. Thiab nws tau qhia tshooj peb ntawm phau Cov Tub Txib, nqes nees nkaum ob thiab nees nkaum peb, ib yam li muaj nyob rau hauv peb Phau Tshiab tam sim no. Nws hais tias tus yaj saub uas nqes vaj lug kub hais ntawd yog tus Khetos; tiam sis lub caij tseem tsis tau txog uas yog thaum “tus neeg tsis mloog tej lus uas tus yaj saub ntawd qhia, yuav raug rho tawm ntawm Vajtswv haiv neeg mus” tiam sis tsis ntev yuav txog.

Tus tim tswv kuj qhia tshooj ob ntawm phau Yau-ees, txij nqes nees nkaum yim mus rau nqes kawg. Nws hais tias tej lus qhia tej yuav muaj los yav tom ntej no tseem tsis tau raug tiav tas, tiam sis tsis ntev yuav muaj. Thiab nws hais ntxiv hais tias lub caij uas Lwm Haiv Neeg yuav kawm txoj moo zoo txhij txhua yuav los txog tsis ntev tom ntej no. Nws tau hais lwm nqes vaj lug kub ntau heev, thiab tau piav ntau yam uas kuv sau tsis tau txog rau hauv cov ntawv no.

Ib zaug ntxiv tus tim tswv hais rau kuv hais tias, thaum kuv tau txais cov phiaj uas nws tau hais lawm–vim lub caij uas kuv yuav tau txais cov phiaj no tsis tau txog–kuv yuav tsum tsis txhob muab tej phiaj no rau leej twg saib li; daim hlau npog hauv siab nrog rau lub Ulees thiab Thumees los tsis txhob pub tib yam; tsuas pub muab rau cov uas Vajtswv txib kom kuv muab xwb; yog kuv muab kuv yuav raug puas tsuaj. Thaum nws tseem tab tom nrog kuv tham txog cov phiaj, txoj kev ua yog toog tau qhib rau kuv lub cim xeeb kom kuv thiaj pom tau qhov chaw uas

*Txoj kev ua  
yog toog tau  
qhib rau kuv  
lub cim xeeb  
kom kuv thiaj  
pom tau qhov  
chaw uas muab  
cov phiaj zais.*

muab cov phiaj zais, thiab pom tau meej meej thiab paub zoo heev ces kuv tau rov qab paub qhov chaw ntawd dua thaum kuv mus xyuas nws.

Tom qab txoj kev sib tham no, kuv tau pom cov tshav uas ci hauv chav tsev pib sau ua ke ncig tus neeg uas tau nrog kuv tham ntawd, thiab tau sau li no, mus txog thaum chav tsev rov qab tsaus ntuj, tsuas tshuav cov tshav uas nyob ncig nws xwb, tam sim ntawd kuv tau pom zoo li, ib txoj kev qhib ncaj qha mus rau saum ntuj ceeb tsheej, ces nws nce mus txog thaum nws txawm ploj kiag lawm, thiab chav tsev txawm rov qab zoo li thaum uas cov tshav ntuj ceeb tsheej no tsis tau los ci rau.

Kuv tseem pw xav ntsoov txog tib qho ntawm qhov uas kuv pom, thiab zoo siab xav ntsoov ntau txog tej uas tus tub txib tseem ceeb no tau qhia rau kuv lawm; thaum kuv tseem xav ntsoov li no, kuv rov pom dua tias kuv chav tsev rov qab pib ci dua tuaj thiab, ces tib pliag ntshis ntawd, tib tug tub txib qub saum ntuj rov qab los sawv ntawm kuv ib sab txaj dua thiab.

**N**ws tau pib, thiab rov qab hais dua ib zaug txog cov lus uas nws twb tau qhia rau kuv ua ntej thaum uas nws los xyuas kuv zaum ib, qhia ib yam tsis txawv hlo li; yam nws tau ua lawm, nws tau qhia rau kuv txog txoj kev txiav txim hnyav uas yuav muaj los rau lub ntiaj teb no, yuav muaj kev puas tsuaj puas ntsoog ntau heev los ntawm kev tshaib kev nqhis, los ntawm hniav ntaj hniav riam,

thiab los ntawm kev mob teb hlob; thiab hais tias tej kev txiav txim mob heev no yuav los rau hauv lub ntiaj teb no nyob rau hauv tiam no ntag. Tom qab nws hais cov lus no tas lawm, nws thiaj rov qab nce dua mus saum ntuj ib yam li nws mus thawj zaug lawm thiab.

Txog sij hawm no, txoj kev zoo siab kev siab nyiam mus tob hauv kuv lub siab, kawg tias txoj kev tsaug zog tau ploj ntawm kuv qhov muag lawm, thiab kuv da qaug zog zis xav tsis thoob txog cov uas kuv tau pom thiab tau hnov. Tiam sis qhov uas ua rau kuv lub siab dhia yog thaum kuv rov pom tib tug tub txib qub rov qab los sawv ntsug ntawm kuv ib sab txaj dua, thiab tau hnov nws rov qab muab dua los sis rov qab hais dua rau kuv tej lus qub uas nws twb tau hais rau kuv ua ntej lawm; thiab nws ceeb toom



*Lub Toj Khumaulas nyob li peb mais rau sab hnuab tuaj sab qab teb me ntsis ntawm tsev neeg Smith daim teb hauv Palmyra, New York. Thaum lub caij uas Yauxej nyob lub toj ntawd sab qaum teb puv nkaus tuaj nyom xwb ho sab qab teb muaj koog ntoo thiab hav zoov. Cov phiaj tau faus cia nyob rau saum lub toj rau sab hnuab poob sab qab teb me ntsis, tsis deb ntawm lub ncow. Duab: Yim Hlis 1907*

kuv ntxiv, hais rau kuv hais tias Ntxwng Nyoog yuav sim ntxias kuv (rau ntawm tej kev txom nyem ntawm kuv txiv tsev neeg), kom kuv nqa cov phiaj mus ua kom kuv nplua nuj. Nws tsis pub kuv ua li no, hais tias kuv yuav tsum tsis txhob muab cov phiaj coj los siv rau lwm yam tsuas yog yuav coj los ua yeeb koob txhawb nqa Vajtswv xwb, thiab yuav tsum tsis txhob mloog luag lwm tus tej tswv yim tsuas yog pab tsa Nws lub koom txoos xwb; tsis li ntawd ces kuv yuav tsis tau txais cov phiaj ntawd.

Tom qab uas tus tim tswv los xyuas kuv zaum peb no, nws rov qab nce mus dua puag saum ntuj ceeb tsheej tib yam li yav dhau los, thiab tau cia kuv rov qab pheej xav txog qhov txawv txawv uas kuv nyuam



qhuav ntsib los no; tib pliag ntshis tom qab uas tus tub txib saum ntuj tau ncaim kuv nce mus saum ntuj zaum peb lawm, qaib txawm qua, thiab kuv paub tias ze yuav kaj ntug lawm, yog li ntawd wb tej kev sib ntsib tau kov mus kov los tag nrho ib hmos li.

Tsis ntev tom qab kuv sawv ntawm kuv lub txaj los, thiab zoo li kuv ib txwm ua kam, kuv txawm mus



*Maulaunais tau rov qab los xyuas tus me nyuam yaj saub ib xyoos ib zaug puv plaub xyoos thiab tau qhia nws ntau yam ntxiv. Tom qab plaub xyoos ntawd tas, Yauxej tau txais cov phiaj thiab pib txhais Phau Ntawv Maumoos.*

ua cov hauj lwm uas hnuv ntawd yuav tsum ua; tiam sis, thaum kuv sim ua hauj lwm zoo li txhua zaus, kuv paub tias kuv qaug zog heev ua rau kuv ua dab tsi ntxiv tsis tau li lawm. Kuv txiv, tus uas nrog kuv ua hauj lwm ua ke, thiaj tau pom tias muaj tej yam dab tsi txawv rau kuv lawm, thiab tau hais kom kuv mus tsev. Kuv tau pib xav tias kuv yuav rov mus tsev; tiam sis, thaum kuv sim hla tus laj kab ntawm daim teb uas wb tau nyob ntawd, kuv cia li tsis muaj ib qho zog hlo li lawm, thiab kuv tau ntog rau hauv pem teb, thiab nco tsis tau dab tsi li mus lawm ib chim.

Thawj yam uas kuv nco tau txog yog lub suab uas hu rau kuv, tuav nkaus kuv lub npe hu. Kuv tau ntsia

zov mus saum ntuj, thiab pom tib tug tub txib qub sawv ncaj saum kuv lub taub hau, muaj qhov ci ncig nws ib yam li cov dhau los lawm. Nws txawm rov qab hais rau kuv dua txog tag nrho cov uas nws twb tau hais rau kuv hmo ua ntej lawm, thiab kom kuv mus cuag kuv txiv thiab qhia rau nws txog txoj kev ua yog toog pom thiab cov lus txib uas kuv tau txais lawm.

Kuv tau ua raws li; kuv tau rov qab mus cuag kuv txiv tom teb, thiab piav tag nrho ib puas yam tsav rau nws. Nws teb rau kuv hais tias yog los ntawm Vajtsv, thiab tau hais kom kuv mus thiab ua raws li tus tub txib tau txib. Kuv thiaj tau ncaim ntawm daim teb mus rau tom qhov chaw uas tus tub txib tau hais qhia rau kuv uas tau muab cov phiaj zais cia; thiab vim txoj kev ua yog toog pom meej uas kuv tau txais txog yam no, kuv twb paub qhov chaw ntawd thaum kuv mus txog ntua.

## Phau Ceev Xwm Txheej Dawb Ceev

Nyob ze ntawm lub zos Manchester, xeev Ontario, xeev teb New York, sawv ib lub me nyuam toj loj tsawv, yog lub siab tshaj plaws lwm cov me nyuam toj nyob ze ntawd. Nyob rau sab hnuv poob ntawm lub me nyuam toj no, tsis deb ntawm lub ncov, nyob hauv qab ib lub pob zeb loj tsawv, cov phiaj nyob rau hauv, nyob rau hauv ib lub txws pob zeb. Lub pob zeb no tuab thiab kheej ntawm nruab nrab sab saum, thiab nyias zog rov sab ntug, ces kom qhov nruab nrab thiaj pom tshwm rau saum npoo av, tiam sis av vov ib ncig ntug huv tib si.

Thaum kuv tshem cov av tag lawm, kuv muab tau ib rab tuam tshij, uas kuv tau muab tsij rau hauv ib sab ntug pob zeb, thiab siv zog me ntsis nyom lub pob zeb kom sawv. Kuv ntsia hauv, thiab kuv txawm pom cov phiaj nyob ntawd tiag, lub Ulees thiab Thumees, thiab daim hlau npog hauv siab, raws li tus tub txib tau hais. Lub txws uas ntim tej no rau hauv yog xuas cov pob zeb tso nyob ua ke rau tej yam av pob zeb. Nyob hauv lub qab txws tau tso ob lub pob zeb tiag lub txws, thiab nyob saum ob lub pob zeb no tau tso cov phiaj thiab lwm yam khoom nrog rau.

Kuv tau sim thau tej no tawm los, tiam sis tus tub txib tau txwv tsis pub kuv thau, thiab tau rov qab qhia kuv dua ib zaug hais tias lub caij thau cov no tawm tseem tsis tau los txog, thiab nws yuav tsis tau,

kom txog thaum plaub xyoos suav txij lub sij hawm ntwawd mus; tiam sis nws tau hais rau kuv hais tias txhua xyoo thaum txog tib lub caij no kuv yuav tsum

*Nyob rau sab  
hnuv poob  
ntawm lub me  
nyuam toj no,  
tsis deb ntawm  
lub ncoov, nyob  
hauv qab ib  
lub pob zeb loj  
tsawv, cov phiaj  
nyob rau hauv,  
nyob rau hauv  
ib lub txws  
pob zeb.*

rov qab tuaj rau ntawm qhov chaw ntwawd, thiab nws hais tias nws yuav ntsib kuv nyob rau qhov ntwawd, thiab nws hais tias kuv yuav tsum ua li no mus txog ntua lub sij hawm uas kuv yuav tau txais cov phiaj.

**R**aws nraim li kuv tau raug txib ua, kuv thiaj tau mus txhua txhua xyoo thaum lub xyoos yuav kawg, thiab txhua zaus uas kuv mus kuv tau ntsib tib tug tub txib nyob qhov ntwawd, thiab tau txais nws cov lus qhia ua thiab lus txawj ntse thaum txhua zaus uas wb sib ntsib, qhia txog tej yam uas tus Tswv yuav ua, thiab saib nws lub

koom txoos nyob rau hauv hnuv nyoog kawg no yuav tsum raug coj thiab khiav li cas.

Vim kuv txiv tsis muaj nyiaj xtiag ntau, peb yuav tsum xuas tes ua hauj lwm, ib hnuv dhau ib hnuv ua luag zog, thiab ua lwm yam, raws li peb nrhiav tau hauj lwm ua. Qee zaum peb nyob hauv tsev, qee zaum peb tawm rooj, thiab vim yog peb txoj kev khwv ua hauj lwm tsis tu tsis tseg li peb thiaj ua tau neej zoo xws luag me ntsis.

*Yauxej tau ua ob peb txoj hauj lwm thiab tau muab noj muab haus thiab ris tsho hnav tej rau nws tsev neeg raws li lawv lub siab nyiam. Thaum xyoo 1825 nws txais ib txoj hauj lwm hauv xeev Chenango, xeev teb New York. Nyob ntwawd nws tau ntsib Emma Hale, uas nws yuav ua poj niam thaum lub Ib Hlis ntuj hnuv tim 18, xyoo 1827.*

Ntev loo lub sij hawm txais cov phiaj, lub Ulees thiab Thumees, thiab daim hlau npog hauv siab tau los txog lawm. Hnuv tim nees nkaum ob lub Cuaj Hlis ntuj, ib txhiab yim pua nees nkaum xya, kuv tau mus li niaj zaus mus thaum kawg lub xyoos mus rau ntawm qhov chaw uas muab cov phiaj zais, tib tug tub txib saum ntuj tau muab tej no rau kuv nrog cov

lus ceeb toom no: Tias kuv yuav tsum saib xyuas tej no kom zoo, hais tias yog kuv muab tej no tso ua dog ua dig, los sis tsis mob siab saib xyuas tej no, kuv yuav raug muab txiav tawm; tiam sis yog kuv yuav rau siab tsom kwm tej no, mus txog thaum nws, tus tub txib, yuav rov qab los nqa, tej no yeej yuav raug tsom kwm.

Tsis ntev kuv txawm paub txog tias tim li cas kuv thiaj tau txais cov lus ceeb toom nruj li ntwawd kom ceev tej no kom txhob muaj teeb meem, thiab tim li cas tus tub txib thiaj tau hais tias thaum uas kuv tau ua tej yam uas nws tau txib kom kuv ua tiav lawm, nws yuav rov qab los nqa tej no. Vim thaum lwm tus paub kiag hais tias kuv muaj tej no, lawv tau siv dag siv zog tuaj txeeb tej no ntawm kuv. Txhua lub tswv yim uas tib neeg xav tau, tau muab siv rau txoj hau kev ntwawd. Txoj kev tsim txom kuv tau iab ntxiv tuaj thiab phem tshaj dua li qub, thiab muaj coob pab neeg tau tos ntsoov txeeb tej no ntawm kuv mus yog lawv txeeb tau. Tiam sis los ntawm Vajtswv lub tswv yim, tej no tau nyob ruaj ntseg hauv kuv txhais tes, mus txog thaum uas kuv tau ua tiav tej yam uas kuv tau raug txib ua lawm. Thaum uas, raws li qhov sib tham ua ntej lawm, tus tub txib tau rov qab los nqa tej no mus, kuv tau muab tej no rau nws; thiab nws ceev tej no los txog niaj hnuv nim no, uas yog hnuv tim ob lub Tsib Hlis ntuj, ib txhiab yim pua peb caug yim.

**N**nyob rau thaum lub Plaub Hlis ntuj hnuv tim 5 xyoo 1829, Oliver Cowdery tau tuaj xyuas kuv. Ua ntej ntwawd kuv yeej tsis tau pom nws dua ib zaug. Nws hais rau kuv hais tias vim nws tau qhia ntawv hauv lub zos uas kuv txiv tau nyob, thiab vim kuv txiv yog ib tug neeg uas xa me nyuam mus rau nws lub tsev kawm ntawv, nws tau nyob ib ntu nrog kuv txiv nyob ntawm nws lub tsev. Thaum nws nyob ntwawd kuv tsev neeg tau qhia nws txog kuv txoj kev txais cov phiaj. Ces tus txiv neej no thiaj li tau tuaj noog ntawm kuv.

Ob hnuv tom qab uas tus Yawg Cowdery tau tuaj txog (uas yog hnuv tim 7, lub Plaub Hlis) kuv txawm pib txhais Phau Ntawv Maumoos thiab nws tau sau ntawv rau kuv.

*Thaum lub Plaub Hlis ntuj xyoo 1829 Yauxej Xamiv, ua ke nrog tus Oliver Cowdery ua tus kws sau ntawv, pib txhais Phau Ntawv Maumoos los ntawm lub txiaj ntsim*


*thiab lub hwj chim uas los ntawm Vajtswv los. Tom qab Yauxej tau txhais lus tiav tas lawm, lwm cov neeg tau txais lub cib fim pom cov phiaj kub. Cov neeg ua tim khawv no twb sau tseg lawv cov lus tim khawv thiab, vim “Yog muaj plaub muaj ntug yuav tsum yog ob leeg los sis peb leeg ua tim khawv thiaj tseem ceeb” (2 Kaulithaus 13:1).*

## Lub Pov Thawj Hwj Rov Qab Los Muaj Txum Tim

**W**b tseem tab tom ua txoj hauj lwm txhais lus tom ntej mus, thaum, nyob rau lub hlis tom ntej (Tsib Hlis, 1829), muaj ib hnuv wb tau mus xyuas koog ntoo kom thov Vajtswv thiab noog txog ntawm tus Tswv hais ntsig txog txoj kev ua kev cai raus dej kom tau kev zam rau tej txim txhaum, vim peb pom nws qhia txog txoj kev cai no hauv cov phiaj uas tab tom txhais. Thaum wb tab tom siv zog, thov thiab hawm tus Tswv, txawm muaj ib tug tub txib nqis los saum ntuj ceeb tsheej los hauv ib twv



*Yauxej Xamiv thiab Oliver Cowdery tau txais lub Pov Thawj Hwj Aloos los ntawm txoj kev tso tes saum taub hau los ntawm Yauhas tus uas Muab Neeg Ua Kev Cai Raus Dej thaum lub Tsib Hlis ntuj hnuv tim 15 xyoo 1829.*



*Yexus Khetos lub Koom Txoos ntawm Tsoom Haiv Neeg Ntseeg hauv Hnuv Nyooog Kawg raug txhim tsa hauv Peter Whitmer Sr. lub tsev thaum lub Plaub Hlis ntuj hnuv tim 6 xyoo 1830. Ze li 60 tus neeg ua tim khawv pom 6 tus txiv neeg ua raws li tej kev cai ntawm lub xeev teb New York kom txhim tsa tau ib lub koom txoos koj kev teev ntuj tshiab.*

huab kaj nrig, thiab thaum nws tau tso nws ob txhais tes saum wb ob lub taub hau, nws tau tsa wb, hais tias:

“Rau neb ob tug uas nrog kuv ua tub qhe ua ke, los ntawm tus Mexiyas lub npe, kuv tso lub Pov Thawj Hwj Aloos, uas tuav cov yuam sij rau ntawm txoj kev pab ntawm tim tswy, thiab ntawm txoj moo zoo ntawm kev hloov siab lees txim, thiab ntawm txoj kev cai raus dej hauv qab thu kom tau kev zam rau tej txim txhaum; thiab lub pov thawj hwj no yeej yuav tsis raug tshem tawm ntawm lub ntiaj teb no mus dua ib zaug mus txog thaum cov neeg Levis cov xeeb ntxwv yuav fij ib yam kev fij rau tus Tswv raws li kev ncaj ncees.”


Nws hais tias lub Pov Thawj Hwj Aloos no tsis muaj lub hwj chim ntawm txoj kev tso tes kom tau txais lub txiaj ntsim ntawm tus Vaj Ntsuj Plig Dawb Huv, tiam sis nws hais tias wb yuav tau txais lub hwj chim no rau lwm lub sij hawm; ces nws txib wb kom wb mus ua kev cai raus dej. Nws txib wb kom kuv muab Oliver Cowdery ua kev cai raus dej tso, ces tom qab ntawd Oliver Cowdery yuav muab kuv ua kev cai raus dej thiab.

**R**aws nraim li nws cov lus ntawd wb mus thiab tau ua kev cai raus dej. Kuv muab Oliver Cowdery ua kev cai raus dej tso, ces tom qab ntawd nws muab kuv ua kev cai raus dej. Tom qab ntawd kuv tau tso kuv ob txhais tes saum Oliver Cowdery lub taub hau thiab tsa nws rau hauv lub Pov Thawj Hwj Aloos, thiab tom qab ntawd nws tau tso nws ob txhais tes


rau saum kuv lub taub hau thiab tsa kuv rau tib lub Pov Thawj Hwj ntawd–vim wb tau raug txib kom ua li ntawd.

**T**us tub txib uas tau los xyuas wb zaum no thiab tau muab lub Pov Thawj Hwj rau wb, nws hais tias nws lub npe yog Yauhas, tib tug Yauhas uas tau Muab Neeg ua Kev Cai Raus Dej hauv Phau Tshiab, thiab nws hais tias nws tau ua tej no raws nraim li tej kev txib thiab kev coj ntawm Petus, Yakanpaus, thiab Yauhas, uas tuav cov yuam sij ntawm lub Pov Thawj Hwj Mekixedes. Thiab nws hais tias tsis ntev thaum raug caij nyoog wb yuav tau txais lub Pov Thawj Hwj Mekixedes no. Nws hais ntxiv hais tias kuv yuav raug hu ua tus Txwj Laug Thib Ib ntawm lub Koom Txoos, thiab (Oliver Cowdery) nws yuav raug hu ua tus Thib Ob. Hnub ntawd yog hnub tim 15 lub Tsib Hlis ntuj xyoo 1829 uas tus tub txib no tau muab wb tsa thiab wb tau ua kev cai raus dej.

Tom qab wb tau ua kev cai raus dej tas thaum wb tab tom tawm hauv dej los tam sim ntawd, wb tau txais tej koob hmoov loj thiab zoo kawg nkaus los ntawm wb Leej Txiv Saum Ntuj Ceeb Tsheej. Thaum



*Phau Ntawv Maumoos, luam tawm thawj zaug thaum xyoo 1830, niaj hnub nim no tab tom luam tawm ua tshaj dua li 80 tawm yam lus thoob plaws lub ntiaj teb no.*



kuv tau muab Oliver Cowdery ua kev cai raus dej tas, tam sim ntawd tus Vaj Ntsuj Plig Dawb Huv tau roos nkaus nws thiab nws sawv ntsug thiab pib qhia txog tej uas yuav muaj los yav tom ntej tsis ntev saum no. Thiab ib zaug ntxiv, thaum nws tau muab kuv ua kev cai raus dej tas, tam sim ntawd kuv kuj tau txais lub txiaj ntsim qhia tej uas yuav muaj los yav tom ntej thiab, ua li thaum kuv sawv ntsug, kuv qhia tej uas yuav muaj los yav tom ntej txog lub Koom Txoos no txoj kev loj hlob tuaj, thiab txog ntau yam ntxiv hais ntsig txog lub Koom Txoos, thiab tiam neeg no. Wb puv nkaus muaj tus Vaj Ntsuj Plig Dawb Huv nrog wb nyob, thiab tau zoo siab hom khaj vim wb tus Vajtswv ntawm txoj kev cawm seej.

*Zaj no yog zaj lus tim khawv zoo thiab tseeb tseeb ntawm Yauxej Xamiv uas qhia txog tej yam tau muaj los mus txog thaum txoj moo zoo txoj kev Muaj Rov Qab Los Txum Tim thiab txoj kev txhim tsa Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg.*

*Kom tau txais ib zaj uas qhia ntxaws ntxaws txog Yauxej Xamiv zaj lus tim khawv no, saib Yauxej Xamiv–Keeb Kwm hauv phau Hlaws uas Muaj Nqis los sis lub Koom Txoos zaj Keeb Kwm, 1:2-79.*